

NAQQIISSUT

Aaqqissuussinikkut allannguisoqarnera peqqutigalugu, siunnersuummut 15. september 2012-imi ullulerneqarsimasumut taarsiussaavoq.

Nunatsinni innarluutillit pisortat namminersortullu suliffeqarfiutaanni ajornannginnerusumik sulilersinnaanissaat aqutissiuunneqaqqullugu Naalackersuisut peqquneqarnissaannik Inatsisartut aalajangiiffigissaattut siunnersuut.

(Inatsisartunut ilaasortat Siverth K. Heilmann aamma Knud Kristiansen, Atassut)

Akissuteqaat:

(Inuussutissarsiornermut Aatsitassarsiornermullu Naalackersuisoq).

Qujavunga Inatsisartunut ilaasortat Siverth K. Heilmann aamma Knud Kristiansen, Atassut Nunatsinni innarluutillit pisortat namminersortullu suliffeqarfiutaanni ajornannginnerusumik sulilersinnaanissaat aqutissiuunneqaqqullugu Naalackersuisut peqquneqarnissaannik siunnersuuteqarnerannut. Aallaqqaasiullugu oqaatigisinnaavara, akisussaaffik innarluuteqartunut tunngasoq, kommuuninut tunniunneqarnikummat.

Naalackersuisut anguniagaraat inuiaqatigiinni nalinginnaasumik inuunerup pitsaassusaata qaffassarnissaa, inuiaqatigiit inuiattut inerikkiartornerannut peqataasinnaasut tamaasa pisariaqartikkatsigik. Soorlu aamma Naalackersuisut isumaqartut, inuit innarluutillit allatuulli suliffittaarnissamut qinnuteqartarnissaq piginnaatitaaffigigaat. Innarluuteqarnerup sulisinnaasuseq akornusinnigippagu, innarluutilik allatuulli piumasaqaatit malillugit atorfinissinnaasaaq, sulinermi avatangiisinut inatsit malillugit isumannaallisaaneq suliffeqarfinni malinneqarnissaannut piumasaqaataagami.

Oqariartuutigineqarpoq periuseq nalinginnaasoq atorlugu nunatsinni innarluutillit amerlanerit siusinaartumik sulisinnaajunnaarnersiuteqartinneqalertartut.

Inuit timikkut, eqqarsartaatsikkut inooqataanikkulluunniit pissutsinik patsiseqartumik inuussutissarsiorsinnaanermikkut ataavartumik appariaateqarsimasut siusinaartumik pensionisianik tunineqarsinnaasarput. Siusinaartumik pensionisianik tunineqarsinnaalersinnagit pineqartoq piginnaanngorsaaqqinniarlugu kommuni misiliisimasussaavoq. Kommunini sulisunut piginnaanngorsaaqqiineq pillugu peqqussut pikkorissaassutigineqaraangat, ”*Siusinaartumik pensionisiat pillugit nalunaarusiaq 2008*”-meersup innersuussutigisaai atorneqartarput, siusinaartumik pensionisiaqalertarnerit annikillineqarniassammata, taamatullu siusinaartumik pensionisiaqalernikut tapersorsorneqarnikkut suliffeqarnermut uteqqinneqarnissaat tassannga inassutigineqarmata, taamaalillutik ataatsimoortumik aningaasaqarneq eqqarsaatigalugu tapertaniassammata.

Siusinaartumillu pensionisiaqartitsinaveersaarnermi piginnaanngorsaaqqiisitsineq qitiulluinnarmat. Piginnaanngorsaaqqinnermut pilersaarut neqeroorutinik imaqassaaq ilinniagaqarnissamut imaluunniit qaffasinnerusumik ilinniagaqarnissamut ikiorsiinissamik, imaluunniit allamik suliaqalernissamut suliamut allamut ilinniarnissamik, imaluunniit sungiusarneqarnissamik innarluutigisimasinnaasat kingunerisaannut imaluunniit ajoqusernerit kingunerisaannut ikiuutaasinnaasumik. Nuna tamakkerlugu agguaqatigiisillugu 400 missaannut ukiumut pigin-

naanngorsaqqiisitsisoqartarpoq, nalinginnaasumik pisortanit namminersortunillu suliffeqarfiit tassaagajuttarlutik piginnaanngorsartitsisartut.

Nalinginnaasumik sulisinnaanngortitsinissaq siunertaralugu piginnaanngorsaaqqinnissamut periarfissat tamarmik periarfissaajunnaarsimappata, kommuniq isumagissavaa, inuit inatsisartut peqqussutaat naapertorlugu siusinaartumik pensionisiaqannngitsut aammalu nalinginnaasumik sulilersinnaanngitsut suliiinnarsinnaanngitsulluunniit eqaannerusumik suliffimmi sulisutut atorfinitsinneqarnissaannik periarfissiuussinissaq.

Eqaannerusumik suliffeqarnissamik kommuni neqerooruteqarsimappat akissarsiat sulinermilu atugassarititat allat, ilanngullugu piffissaq suliffissaq, suliaqarfimmut isumaqatigiissutit atuutut aallaavigalugit aalajangersarneqassapput. Suliaqarfimmi isumaqatigiissuteqarfiunngitsuni aallaavigineqassapput suliaqarfiit nallersuunneqarsinnaasut. Eqaannerusumik sulisinnaaneq eqqarsaatigalugu taamaalilluni inatsisitigut periarfissaqartoqareerpoq.

Naalakkersuisut tunngaviumik anguniagaannut ilaavoq, innuttaasut annertunerpaamik tamakkiisumik ilaannakortumilluunniit namminerisamik pilersornissaat taamatullu nunatta aningaasaqarneranut peqataalluarnissaat namminerisamullu inerikkiartornissaq eqqarsaatigalugu. Tamanut taanna atuuppoq, innarluutilinnullu pisinnaasaq aallaavigalugu aamma atuulluni.

Inuusuttut innarluutillit atuarfeqarnerup qimanneraniit, ilinniarnissamut taamatullu sulilernissamut periarfissaqartilluarumallugit, iliuusissamut pilersarusiortoqassaaq. Pingaaruteqarporli suliaq tamanna annertusarneqarnissaa, taamaalilluni innarluutillit naleqquttumik ilinniagaqarnissamut neqerooruteqarfigineqartarniassammata, ilinniarnermut tapiissuteqarlutik. Taamatuttaaq aamma pisariaqartinneqarpoq paasissallugu, aamma inuit innarluutillit annertunerusumik sulisinnaassusaat aallaavigalugu suliffeqarnermut periarfissinneqartarnersut.

Innarluuteqartut suliffeqarniarnikkut periarfissat ataavartumik pitsanngorsaavigineqartuarnissaat sulissutiginiarneqarmat, Naalakkersuisut siunnersuut akuerineqartussanngorlugu inassutigaaq.